

王寧朔集題詞

齊世祖禊宴芳林使王元長爲曲水  
詩序有名當世北使欽矚擬于相如  
封禪梁昭明登之文選玄黃金石斐  
然盈篇卽詞涉比偶而壯氣不沒其  
焜耀一時亦有繇也竟陵王宗子長





賢元長投許情分法門贊頌如墳如  
箎彼此之交謂以淨照相得而傖楚  
入幕戎服災身蘭室梅崖豈宜若是  
夫南齊王業太孫壞之孝武多男西  
昌賊之設元長志遂竟陵當陽蕭氏  
福祚可世世也謀敗獄死天卽惡搥

車之躁其不祐齊則久矣人但見王  
郎年未三十心熱公輔并笑其斷仗  
一舉債取瓦裂猶然成敗之見乎元  
長獄中據答自云上甘露頌銀甕啟  
及三日詩序接虜使語辭竭思稱揚  
得非誹謗夫穰侯相印不可遽得終

子雲賈長沙才則我自有也又曷不  
少從容引分資成不朽哉

婁東張溥題

王寧朔集目錄

賦

風賦

桐樹賦應竟陵王教

疏

上北伐圖疏

議給虜書疏

請習校部曲疏

表



拜秘書丞謝表

爲王儉讓國子祭酒表

又

獄中據荅表

策問

永明九年策秀才文五首

永明十一年策秀才文五首

啓

求自試啓

法門頌啓

謝勅賜御裘等啓

謝勅賜米啓

謝竟陵王示法制啓

謝竟陵王示扇啓

謝竟陵王賜納裘啓

謝司徒賜紫鮮啓

謝武陵王賜弓啓

謝安陸王賜銀鉢啓



書

爲竟陵王與隱士劉虬書

序

三月三日曲水詩序

頌

淨行頌三十一首

皇覺辯德篇頌

開物歸信篇頌

滌除三業篇頌

修理六根篇頌

生老病死篇頌

尅責身心篇頌

檢覆三業篇頌

訶詰四大篇頌

出家順善篇頌

在家從惡篇頌

沈冥地獄篇頌

出家懷道篇頌



在家懷善篇頌

三界內苦篇頌

出三界外樂篇頌

斷絕疑惑篇頌

十種慚愧篇頌

極大慚愧篇頌

善友獎勸篇頌

戒法攝心篇頌

自慶畢故止新篇頌

大忍惡對篇頌

緣境無礙篇頌

一志努力篇頌

禮舍利寶塔篇頌

敬重正法篇頌

奉養僧田篇頌

勸請增進篇頌

隨喜萬善篇頌

迴向佛道篇頌



發願莊嚴篇頌

哀策文

皇太子哀策文

墓銘

豫章王墓銘

永嘉長公主墓銘

樂府

齊明王一辭七首

明王曲

聖君曲

淶水曲

採菱曲

清楚引

長歌引

散曲

三婦艷詩

青青河畔草

同沈右率諸公賦鼓吹曲二首



巫山高

芳樹

臨高臺

望城行

法樂辭十二首

右歌本起

右歌靈瑞

右歌下生

右歌在宮

右歌四遊

右歌出國

右歌得道

右歌雙樹

右歌賢衆

右歌學徒

右歌供具

右歌福應

少年子

江臯曲

思公子

王孫遊

陽翟新聲

永明樂十首

奉和秋夜長

代五雜組

奉和織織

詩

贈族叔衛軍

從武帝琅琊城講武應詔

棲玄寺聽講畢遊邸園七韻應司徒教

雜體報范通直

別蕭諮議

寒晚敬和何徵君點

和王友德元古意二首

奉和竟陵王郡縣名

遊仙詩五首



春遊迴文詩

侍遊方山應詔

奉辭鎮西應教

餞謝文學離夜

和南海王殿下詠秋胡妻七首

琵琶

詠幔

藥名

星名

奉和月下

詠池上梨花

詠梧桐

詠女蘿

移席琴室應司徒教

抄衆書應司徒教

自君之出矣

擬古二首

四色詠

離合賦物爲詠

雙聲詩

聯句

阻雪連句遙贈和

附錄

本傳

王寧朔集終



王寧朔集卷全

齊瑯琊王 融著

明太倉張 溥閱

賦

風賦

奄今日采之既移，忽兮群景之將馳。靡輕筠之  
碧葉，汎會松之翠枝。總高羽而蕭瑟，韻珠露之  
參差。此烈士之英風，長寥亮其如斯。

桐樹賦應竟陵王教



梧桐生矣，於邱岫之會隈，儀龍門而插幹，佇鳳羽以抽枝，蹤楚宮而留稱，藉溜館以翻聲，直不繩而特秀，圓匪規而天成，同歲草以萎暮，共辰物而滋榮，豈遠心以自外，寧有志於孤貞。

疏

上北伐圖疏

臣聞情愔自中，事符則感，象構於始，機動斯彰，莊敬之道可宗，會揖讓其彌肅，勇烈之士足貴，應輦鐸以增思，肇植生民，厥詳旣緬，降及興運，維道有徵，莫不有所因循而升皇業者也。若夫膏腴旣稱，天乙知五方之富，皮幣已列，帝劉測四海之尊，異封禪之文，則升中之典，攸鬯，歎興地之圖，乃席捲之庸，是立伏惟陛下，窮神盡聖。



總極居中。偶化兩儀。均明二曜。拯玄綱於頽絕。反至道於澆淳。可謂區宇儀刑。齊民先覺者也。臣亦遭逢。生此嘉運。鑿飲畊食。自幸唐年。而識用昏霾。經術疎淺。將邁且軸。豈蕨與薇。皇鑒燭幽。天高聽下。賞片言之或善。矜一物之失時。滿拂塵蒙。霑飾光價。拔足草廬。廁身朝序。復得拜賀歲時。瞻望日月。於臣心願。會已畢矣。但千祀一逢。休明難再。思策鉛鴛。樂陳涓壚。竊習戰陳攻守之術。農桑牧藝之書。申商韓墨之權。伊周

孔孟之道。常願待詔朱闕。俯對青蒲。請閑宴之私。談當世之務。位賤人微。徒深傾欵。方今九服清怡。三靈和晏。木有附枝。輪無異轍。東鞮獻舞。南辨傳歌。羗棘踰山。秦屠越海。舌象翫委。體之勤。輶譯厭瞻。巡之數。固將開桂林於鳳山。創金城於西守。而蠢爾獯狄。敢讎大邦。假息關河。竊命函谷。淪故京之爽塏。變舊邑而荒涼。息及玷之儒衣。久伊川之被髮。北地殘民。東都遺老。莫不茹泣吞悲。傾耳戴目。翹心仁政。延首王風。若



試馳咫尺之書。具甄戎旅之卒。徇其墜城。納其降虜。可弗勞弦鏃。無待干戈。真皇王之兵。征而不戰者也。臣乞以執父先邁。式道中原。澄瀚渚之恒流。掃狼山之積霧。係單于之頸。屈左賢之膝。習呼韓之舊儀。拜鑿輿之巡幸。然後天移雲動。勒封岱宗。咸五登三。追蹤七十。百神肅警。萬國具僚。瓊弁星離。玉帛雲聚。集三燭於蘭席。聆萬歲之禎聲。豈不盛哉。豈不遑哉。昔桓公志在伐莒。郭牙審其幽趣。魏后心存去漢。德祖究其

深言。臣愚昧忖誠。不足以知微。然伏揆聖心。規模宏遠。旣圖載其事。必克就其功。臣不勝歡喜

議給虜書疏

虜使遣求書。朝議欲不許。融上疏請許之。

臣側聞僉議。疑給虜書。如臣愚情。切有未喻。夫虜人面獸心。狼猛蜂毒。暴悖天經。虧違地義。逋竄燭幽。去來幽朔。綿周漢而不悛。歷晉宋其踰梗。豈有愛敬仁智。恭讓廉脩。慙犬馬之馴心。同鷹虎之反目。設橐秣有儲。筋竿足用。必以草竊



關燧寇擾邊疆寧容款塞卑辭承衣請朔陛下  
務存遵養不時侮亡許其膜拜之誠納裘之費  
况復願同文軌儻見款遣思奉聲教方致猜拒  
將使舊邑遺逸未知所寘衰胡餘噍或能自推  
一令蔓草難鉏涓流泛酌豈直疥癢輕痲容爲  
心腹重患抑孫武之言也困則數罰窘則多賞  
先暴而後畏其衆者虜之謂乎前中原士庶雖  
淪懾殊俗至於婚葬之晨猶巾禱爲禮而禁令  
苛刻動加誅轅于時獯粥初遷太羊尚結即心

徒怨困懼成逃自其將卒奔離資峙銷闕北畏  
勅蠕西逼南胡民背如崩勢絕防斷於是曲從  
物情僞竊章服歷年將絕隱蔽無聞旣南向而  
泣者日夜以覲北顧而辭者江淮相屬凶謀歲  
窘淺慮無方於是稽顙郊門問禮求樂若來之  
以文德賜之以副書漢家軌儀重臨畿輔司隸  
傳節復入關河無待八百之師不期十萬之衆  
固其提漿佇俟揮戈願倒三秦大同六漢一統  
又虜前後奉使不專漢人必介以匈奴備諸覘



獲且設官分職。彌見其情。抑退舊苗。扶任種戚。師保則后族。馮晉國。總錄則邾姓。直勒渴。侯台鼎。則丘頹。苟仁。端執政。則目凌鉗耳。至於東都羽儀。西京簪帶。崔孝伯。程虞。蚪久在著作。李元和。郭季祐。上于中書。李思冲。飾虜清官。游明根。泛居顯職。今經典遠被。詩史北流。馮李之徒。必欲遵尚。直勒等類。居致乖阻。何則。匈奴以氈騎爲帷床。馳射爲糒糧。冠方帽。則犯沙陵雪。服左袒。則風驟鳥逝。若衣以朱裳。戴之玄冕。節其揖

讓。教以翔趨。必同艱桎。桔等懼冰淵。婆娑蹶躓。困而不能前。已及夫春草水生。阻散馬之適。秋風木落。絕驅禽之歡。息沸脣於桑墟。別醜乳於冀俗。聽韶雅如臙贖。臨方丈若爰居。馮李之徒。固得志矣。虜之凶族。其如病何。於是風土之思。深。復戾之情。動。拂衣者連裾。抽鋒者比鏃。部落爭於下。酋渠危於上。我一舉而兼吞。卞莊之勢。必也。且棘實薦虞。晉疆彌盛。大鍾出智。宿氏以亡。帝略遠孚。無思不服。鑿光幸岱。匪暮斯朝。臣



請收籍伊瀝。茲書復掌。猶取之內府。藏之外籟。於理有愜。卽事何損。若狂言足採。請決敕施行。

請習校部曲疏

臣每覽史傳。見憂國忘家。捐生報德者。未嘗不撫卷歎息。以爲今古共情也。然或以片言微感。一食小惠。參國士之眄。同布素之遊耳。豈有如臣獨拔無聞之伍。過超非分之位。名器雙假。榮祿兩升。而宴安晷罷之晨。優游盱食之日。所以敢布丹愚。仰聞宸聽。今議者或以西夏爲念。臣

竊謂之不爾。其故何哉。陛下聖明。群臣悉力。順以制逆。上而御下。指開賞黜之言。微示生死之路。方域之人。皆相爲敵。旣兵威遠臨。人不自保。雖窮鳥必咏。固等命於梁鶉。困獸斯驚。終並懸於厨鹿。凱師勞飲。固不待晨。臣之寸心。獨有微願。自獫狁薦食。荒侮伊瀝。天道禍淫。危亡日至。母后內難。兵力外虛。謠言物情。屬當今會。若藉巫漢之歸師。騁士卒之餘憤。取函谷如反掌。陵關塞若摧枯。但士非素蓄。無以卽用。不教民戰。



是實棄之，特希私集部曲，豫加習校。若蒙垂許，乞隸監省，拘食人身，權備石頭防衛之數。臣少重名節，早習軍旅，若試而無績，伏受面欺之誅。用且有功，仰訓知人之哲。

表

、拜秘書丞謝表

臣聞升離戒晨，陰牆不照其景。膚雲停夕，幽草或漏其津。至如明兼就日，澤深行雨。不有聖德，誰或其然。所以欽至道而出青皐，捨布衣而望朱闕。懷祿仕在，代耕期榮。不謀入用，豈悟特擢之例。事均延祖，置左之恩。任光元幹，踰溢情涯。普燭身表，畏翹車而必讓。誠濡翼之願辭，旣聖主謂其可施，故愚臣默思自勉。



爲王儉讓國子祭酒表

竊以庠均義重振古所崇資師道尊有來攸尚  
匪曰蘭芷疇變入室之情不自朱藍何遷素絲  
之質况臣仁慙富侶德謝潤身識陋令經器非  
匣重何以昇墜道於殊年反斯交於遙日將使  
良璣修竹無增瑩羽敬遜務時遂騫星歲

又

臣聞修瓦方湛弱露霑而取覆懸衡紀正輕塵  
委而必移况臣才非應俗用乖知治取其集米  
飲水旌懸輪駑方臣之念未足言矣

獄中據答表

囚寔頑蔽觸行多讐但夙參門素得奉教君子  
爰自總髮迄將立年州閭鄉黨見許愚慎朝廷  
衣冠謂無豐咎過蒙大行皇帝獎育之恩又荷  
文皇帝識擢之重司徒公賜預士林安陸王曲  
垂眄接旣身被國慈必欲以死自効前後陳伐  
虜之計亦仰簡先朝今段犬羊乍擾紀僧真奉  
宣先敕賜語北邊動靜令囚草撰符詔于時即



因啓聞希侍鑿輿及司徒宣敕招募同例非一實以戎事不小不敢承教續蒙軍號賜使招集銜敕而行非敢虛扇且格取亡叛不限僮楚狡弄聲勢應有形迹專行權利又無贓賄反覆唇齒之間未審悉與誰言傾動頰舌之內不容都無彼此但聖主膺教實所沐浴自上甘露頌及銀甕啓三日詩序接虜使語辭竭思稱揚得非誹謗且王公百司唯賢是與高下之敬等秩有差不敢踰濫豈應訛毀因才分本劣謬被策用悚忤之情夙宵兢惕未嘗誇示里閭彰曝遠邇自循自省並愧流言良由緣淺寡虞致貽囂謗伏惟明皇臨宇普天蒙澤戊寅赦恩輕重必宥首日曠期始蒙旬日一介罪身獨嬰憲劾若事實有徵爰對有在九死之日無恨泉壤



策問

○永明九年策秀才文五首

問秀才高第明經。朕聞神靈文思之君。聰明聖德之后。體道而不居。見善如不及。是以崆峒有順風之請。華封致乘雲之拜。或揚旌求士。或設簾待賢。用能敷化一時。餘烈千古。朕夙奉天命。恭惟永圖。審聽高居。載懷祇懼。雖言事必史。而象闕未箴。寤寐嘉猷。延佇忠實。子大夫選名升學。利用賓王。懋陳三道之要。以光四科之首。鹽



梅之和屬有望焉。

又問昔周宣情千畝之禮。號公納諫。漢文缺三推之義。賈生直言。良以食惟民天。農爲政本。金湯非粟而不守。水旱有待而無遷。朕式照前經。寶茲稼穡。祥正而青旗肅事。土膏而朱紘戒典。將使杏花菖葉。耕穫不愆。清明冷風。述遵無廢。而釋耒佩牛。相沿莫反。兼貧擅富。浸以爲俗。若爰井開制。懼驚擾愚民。馮鹵可腴。恐時無史。白興廢之術。矢陳厥謀。

又問議獄緩死。大易深規。敬法卹刑。虞書茂典。自珉俗澆弛。法令滋彰。肺石少不寃之民。棘林多夜哭之鬼。朕所以明發動容。旻食興慮。傷秋荼之密網。惻夏日之嚴威。永念書冠。緬追刑厝。徒以百鍰輕科。反行季葉。四支重罰。爰創前古。訪遊禽於絕澗。作霸秦基。歌鷄鳴於闕下。稱仁漢牘。二途如爽。即用兼通。昌言所安。朕將親覽。又問聚人曰財。次政曰貸。泉流表其不匱。懋遷通其有無。旣龜貝積寢。緡纆專用。世代茲多。銷



王寧朔集 卷全 三  
漏參倍。下貧無兼辰之業。中產關洊歲之貲。惟  
瘼卹隱。無捨矜歎。上帝溥臨。賜朕休寶。印斜之  
谷。開而出銅。且有後命。事茲鎔範。克都內之金。  
紹園府之職。但赤仄深巧學之患。榆莢難輕重  
之權。開塞所宜。悉心以對。

又問治曆明時。昭遷革之運。改憲勅法。審刑德  
之原。分命顯於唐官。文條炳於鄒說。及嶠夷廢  
職。昧谷虧方。漢秉素祇之徵。魏稱黃星之驗。紛  
諍空軫。疑論無歸。朕獲纂洪基。思弘至道。庶令  
日月休徵。風雨玉燭。克明之旨。弗遠欽若之義。  
復還於子大夫。何如哉。其驪翰改色。寅丑殊建。  
別白書之。

○永明十一年策秀才文五首

問秀才朕秉籙御天。握樞臨極。五辰空撫。九序  
未歌。至於思政明臺。訪道宣室。若墜之惻。每勤  
如傷之念。恒軫故恤。貧緩賦省。徭慎獄幸。四境  
無虞。三秋式稔。而多黍多稌。不興兩穗之謠。無  
褐無衣。必盈七月之歎。豈布政未優。將疲民難



業登爾於朝，是屬宏議，罔弗同心，以匡厥辟。又問：惟王建國，惟典命官，上叶星象，下符川嶽，必待天爵具修，人紀咸事，然後公才授位，揆務分司。是以五正置於朱宣，下民不忒；九工開於黃序，庶績其凝。周官三百，漢位兼倍，歷茲以降，游情寔繁。若閑冗畢，棄則橫議無已；冕笏不澄，則坐談彌積。何則可修，善詳其對。

又問：昔者賢牧分陝，良守共治，下邑必樹其風，一鄉可以爲績。至有旦撫鳴琴，日置醇酒，文而無害，嚴而不殘，故能出人於阡危之域，躋俗於仁壽之地。是以賈誼有言：下之有惡，吏之罪也。頃深汰珪符，妙簡銅墨，而春雉未馴，秋螟不散。入在朕前，湊其智略；出連城守，闕爾無聞。豈薪樵之道未弘，爲網羅之自尚簡，悉意正辭，無侵執事。

又問：朕聞上智利民，不述於禮。大賢彊國，罔圖惟舊。豈非療飢不期於鼎食，拯溺無待於規行。是以三王異道而共昌，五霸殊風而並烈。今農



戰不修文。儒是競棄。本狗末厥。弊滋多昔。宋臣以禮樂爲殘賊。漢主比文章於鄭衛。豈欲非聖無法。將以旣道而權。今欲專士女於耕桑。習鄉閭以弓騎。五都復而事庠序。四民富而歸文學。其道奚若。爾無面從。

又問自晉氏不綱。關河蕩析。宋人失馭。淮汴崩離。朕思念舊民。永言攸濟。故選將開邊。勞來安集。加以納款通和。布德脩禮。歌皇華而遣使。賦膏雨而懷賓。所以關洛動南望之懷。焦夷遽北歸之念。夫危葉畏風。驚禽易落。無待干戈。聊用辭辯。片言而求三輔。一說而定五州。斯路何階。人誰或可。進謀誦志。以沃朕心。



啓

○求自試啓

臣聞春庚秋蟀，集候相悲。露木風榮，臨年共悅。夫惟動植，且或有心。况在生靈，而能無感。臣自奉望宮闕，沐浴恩私。拔迹庸虛，參名盛列。纓劍紫複，趨步丹墀。歲時歸來，誇榮邑里。然無勤而官。昔賢曾議，不任而祿。有識必譏，臣所用慷慨懣，不遑自安。誠以深恩鮮報，聖主難逢。蒲柳先秋，光陰不待。貪及明時，展悉愚効。以酬陛下



不世之仁。若微誠獲信。短才見序。文武更法。惟所施用。夫君道含弘。臣術無隱。翁歸乃居中。自見克國。曰莫若老臣。竊景前脩。敢蹈輕節。以冒不媒之鄙。式罄奉公之誠。抑又唐堯在上。不參二人。管夷吾耻之。臣亦耻之。願陛下裁覽。

法門頌啓

伏以迦文啓聖。道冠百靈。常住置言。理高萬乘。神儀挺發。非望雲就日所追。睿識獨尊。豈生明弱。言能企鹿苑金輪。弘汲引以濟俗。鶴林雙樹。顯究竟以開珉。惜乎祇園滅影。鷲岳淪光。微辭既遙。大義如綴。自不宣游十地。擁接九區。豈有導覺水之塞源。拯法雲於落仞。明公覽四諦之必空。悟三業之暫有。應務屈已。則仁兼巨奩。隨方申道。則慧一淨名。驅率土於福林。入蒼黔於正術。

謝勅賜御裘等啓

雲衣降授。仙裾曲委。榮振素里。澤駭蓬心。昔漢帝解裘。不獨前寵。曹王褫帶。復降今恩。



謝勅賜米啓

臣無王陽之術，計然之智，不能負粟百里，分地一廛。上虧溫養，自取飢切。豈悟外恩橫集，天私妄委。

謝竟陵王示法制啓

翔慧燭於昏塗，灑法水於塵路。至夫澄心洗累，之規莊情。束影之制，解網出界之訓。滅惑淨照之旨，固以行首霜威。字端風厲，信可以糟滓五書，糠氛百氏。升罩聃周，筭竿尼旦。所謂窺七澤

而狹潢汙，登太山而小天下。

謝竟陵王示扇啓

竊以六翮風流，五明氣重。若比圓綃，有兼玩實。輕踰雪羽，潔竝霜文。子淑賞其如規，班姬儷之。明月豈直魏王九華，漢臣百綺。况復動製聖衷，垂言炯戒。載摹聽眎，式範樞機。

謝竟陵王賜納裘啓

降飾自尊，垂榮及賤。玄玉不純，曾波奪采。南陸方永，北風日壯。無衣無褐，發念聖衷。而挾纊之



問每流解裘之賜偏委

、謝司徒賜紫鮓啓

東越水羞寔罄乘時之美南荆任土方揖鮓魚之最

謝武陵王賜弓啓

殿下摘藻蕙樓暢藝蘭苑敷積玉於風筵疊連珠於月的兔圍掩秀鄴水慚奇融揖讓未工濫陪升飲之賞操弧反正繆奉招賢之錫文韜鏤景逸幹捎雲玩溢百齡佩流千載

、謝安陸王賜銀鉢啓

素金之貴有訪仙經鐫刻可奇見符神鼎撤膳器於珍羞之席降寶玩於簞瓢之門



書

、、爲竟陵王與隱士劉虬書

玉燭登年。金商在律。炎涼始貿。動靜惟安。勤味道腴。幸遵雅尚。豈不樂哉。僕誠幸甚。百姓一心。衆生不疾。比屋可封。將又何求。但良書獨擁。善談無析。願言之子。實痲我心。所以不遠千里。尺書道意。自淳清旣辨。澆漓代襲。隱顯之術參差。默語之途紛互。或飾智以警愚。或激情以悟俗。或穢已以闡通。或謬歌以明道。屠羊駟馬。未足



磷其堅。佯狂如愚。豈能緇其白。官楚蕃魏。人外之氣逾邈。入漢游梁。區中之韻彌少。及推其輕重。品其得失。則淵懷洞賞。寧或符之。僕夙養閒襟。長慕出槩。迹塵珪組。心逸江湖。末面自親。聞風如舊。而迴駕之念徒軫。式閭之禮無階。固已佇軸深衷。傾筐遐路者矣。君矯然獨遠。確乎難拔。素志與白雲同悠。高情與青松共爽。宣習質文。緇林枯而重菀。昭辨空有。連河壅而復滔。所謂忘言之人。可論天人之際。豈能鳳舉鶴翻。有

心儀羣。高踰愛海。比策禪衢。沾濠射之冥游。屈祇驚之法侶。闡三乘於窮子。發二諦於困蒙。有是因也。何其暢歟。今皇風具穆。至道弘被。四海不溢。五嶽無塵。膠序肇修。經法敷廣。人賤璣璜。家習禮讓。樵蘇必時。郊林全鬱。罟網有節。鱗羽偕翔。至於層山絕澗。還帶畿畎。膏田沃野。亘望廡躔。信可以招往隱淪。栖集勝寄。故文舉築室治城之阿。次宗植援西山之趾。葛洪考槃於海岫。釋遠肥遁於鍾幽。每踐其遺蹤。輒深九原之



歎若高步可遷。復何懷乎四子。昔宣尼之見伯  
雪。師利之往維摩。豈不知相忘之道哉。諒有以  
也。未敘之間。爲道自愛一二。令凌琚之口具。

序

三月三日曲水詩序

臣聞出豫爲象。鈞天之樂張焉。時乘旣位。御氣  
之駕翔焉。是以得一奉宸。逍遙襄城之域。體元  
則大。悵望姑射之阿。然睿耿寂寥。其獨適者已。  
至如夏后兩龍。載驅璿臺之上。穆滿八駿。如舞  
瑤水之陰。亦有饗云。固不與萬民共也。我大齊  
之握機創曆。誕命建家。接禮貳宮。考庸太室。幽  
明獻期。雷風通饗。昭華之珠旣徙。延喜之玉攸



歸革宋受天保生萬國度邑靜鹿丘之歎遷鼎  
息大垌之慙紹清和於帝猷聯顯懿於王表駿  
發開其遠祥定爾固其洪業皇帝體膺上聖運  
鍾下武冠五行之秀氣邁三代之英風昭章雲  
漢暉麗日月牢籠天地彈壓山川設神理以景  
俗敷文化以柔遠澤普汜而無私法含弘而不  
殺猶且具明廢寢具畧忘餐念負重於春冰懷  
御奔於秋駕可謂巍巍弗與蕩蕩誰名秉靈圖  
而非泰涉孟門其何險儲后睿哲在躬妙善居

質內積和順外發英華斧藻至德琢磨令範言  
炳丹青道潤金壁出龍樓而問豎入虎闥而齒  
胄愛敬盡於一人光耀究於四海若夫族茂鱗  
趾宗固磐石跨躐昌姬韜軼炎漢元宰比肩於  
尚父中鉉繼踵乎周南分陝流勿翦之歡來仕  
允克施之譽莫不如珪如璋令問令望朱芾斯  
皇室家君王者也本枝之盛如此稽古之政如  
彼用能免群生於湯火納百姓於休和草萊樂  
業守屏稱事引鏡皆明目臨池無洗耳沈冥之



怨既缺，適軸之疾已消，興廉舉孝，歲時於外府，署行議年，日夕於中甸，協律總章之司，序倫正俗，崇文成均之職，導德齊禮，挈壺宣夜，辨氣朔於靈臺，書笏弭彤，紀言事於仙室，褰帷斷裳，危冠空履之吏，影搖武猛，扛鼎揭旗之士，勤恤民隱，糾逃王慝，射隼隼於高墉，繳大風於長隧，不仁者遠，惟道斯行，讒莠茂聞，攘爭掩息，稀鳴桴於砥路，鞠茂草於園扉，耆年闕市井之游，稚齒豐車馬之好，宮隣昭泰，荒憬清夷，侮食來王左。

言入侍，離身反踵之君，髮首貫胸之長，屈膝厥角，請受纓縻，文鉞碧帑之琛，竒幹善芳之賦，純牛露犬之玩，乘黃茲白之駟，盈衍儲邸，克勗郊虞，匪牘相尋，鞮譯無曠，一尉候於西東，合車書於南北，暢轂埋麟，麟之轍，綏旌卷悠悠之旆，四方無拂，五戎不距，偃革辭軒，銷金罷刃，天瑞降地，符升澤馬來，器車出紫脫華，朱英秀，佞枝植，曆草滋，雲潤星暉，風揚月至，江海呈象，龜龍載文，方握河沈璧，封山紀石，邁三五而不追，踐八



九之遙迹，功既成矣。世既貞矣，信可以優游暇豫。作樂崇德者歟。于時青鳥司開，條風發歲，粵上斯已。惟暮之春，同律克和。樹草自樂，襍飲之日在茲。風舞之情咸蕩，去肅表平時訓。行慶動於天矚，載懷平圃。乃睠芳林，芳林園者，福地奧區之湊。丹陵若水之舊，殷殷均乎姚澤。煦煦尚於周原，狹豐邑之未宏。陋譙居之猶褊，求中和而輕處。揆景緯以裁基，飛觀神行。虛檐雲構，離房乍設。層樓間起，負朝陽而抗殿。跨靈沼而浮

榮，鏡文虹於綺疏。浸蘭泉於玉砌，幽幽叢薄。秩秩斯干，曲拂迢迢。潺湲徑復，新萍泛沚。華桐發岫，雜天采於柔荑。亂嚶聲於縣羽，禁軒承幸。清宮俟宴，緹帷宿置。齋幕宵懸，旣而滅宿。澄霞登光辨色，戒道執爨。展軫效駕，徐鑿警節。明鐘暢音，七萃連鑣。九旂齊軌，建旗拂蜺。揚葭振木魚，甲煙聚貝胄。星羅重英，曲瑤之飾。絕景追風之騎，昭灼甄部。駟駿函列，虎視龍超。雷駭電逝，轟轟隱隱。紛紛軫軫，羌難得而稱計。爾乃迴輿駐



罕嶽鎮淵停，睟容有穆，賓儀式序，投几肆筵，因  
流波而成次，蕙肴芳醴，任激水而推移，葆侑陳  
階，金匏在席，戚奏翹舞，籥動邠詩，召鳴鳥於弇  
州，追伶倫於嶰谷，發參差於王子，傳妙靡於帝  
江，清歌有闕，羽觴無筭，上陳景福之賜，下獻南  
山之壽，信凱讌之在藻，知和樂於食苹，桑榆之  
陰，不居草露之滋，方渥有詔曰，今日嘉會，咸可  
賦詩，凡四十有五人，其辭云爾。

頌

淨行頌三十一首

皇覺辨德篇頌

紫實昧朱，狂斯濫哲，舛逕揚鑣，分源競柁，麗景  
或幽，澄舒每缺，水激波生，湮深火滅，情端徒總，  
理向空徹，不有明心，誰驅聖轍。

開物歸信篇頌

生浮命舛，識罔情違，業雲結影，慧日潛暉，透迤  
修道極夜，無歸登山，小魯泛海，難沂參珉，見壁



王寧齋集 卷全  
辨礫知璣，迷其未遠，匪正何依。

滌除三業篇頌

樂由生滅，患以身全。業資意造，事假言筌。利名畢倚，榮辱茲纏。燕驥匪躡，周錯徒鑄。惑端風緒，愛境旌懸。不勤一至，何階四禪。

脩理六根篇頌

傾都麗佳，繞梁之曲。肥馬輕裘，蕙肴芳醪。晦黑滋生，昏瞶競欲。貌蕩魂浮，身甘意觸。靈龜攝根，晴葵衛足。蟲草或虞，人如不勗。

生老病死篇頌

穠華易遷，繁蕉不實。星髮鮭肌，鄰光愒日。二豎潛言，十空空術。生之往矣，高松蕭瑟。即化翻靈，從緣墜質。噬臍有譏，嗟然何汨。

尅責身心篇頌

瞻彼進德，莫敢惑遑。顧咨小智，徒以大康。豈無通術，跋此榛荒。雖有重離，迹照螢光。循情內負，撫事外傷。層羅一舉，空念高翔。

檢覆三業篇頌



王寧朔集 卷全  
渾風緬沒，旅俗膠加。競文內疾，誰覩心瑕。再惟情反，三省身華。貴危窮濫，貧懾豪奢。邇迴六蔽，紛綸七邪。不圖厥始，逸馬難且。

訶詰四大篇頌

迅矣百齡，綿茲六入。出沒昏疑，興居愛習。矻矻子求，營營爾給。匪德日歸，惟殃斯集。貪人敗類，無厭自及。昭回不希，玄墟何泣。

出家順善篇頌

澡身浴德，晦迹埋名。將安寶地，誰留化城。道場

曠謐，禪逕閒清。風飄弗響，震嗽徒驚。嘯傲焉慮，脫落何營。長捐有結，永寘無生。

在家從惡篇頌

石磨則磷，玉生雖堅。維居必徙，豈日能賢。冰開春日，蘭敗秋年。教隨類反，習乃情遷。命符三漏，生偕十纏。茲焉遂往，憂畏方延。

沈冥地獄篇頌

冥津殊復曉，高聽亦能卑。陰牆雖兩密，幽夜有四知。炎山翻烈火，冰澗弔寒澌。羅城振雲幕，鋒



樹鬱霜枝，茹荼非云苦。集木豈稱危，求仁曾已得。長歎欲何爲。

出家懷道篇頌

韞石諒非真，飾瓶信爲假。竊服臯門上，濫吹溜軒下。鳳祀徒驚心，騶交終好野。實相豈或照，浮榮未能捨。迹殊冠冕客，事襲驅馳者。已矣歇鄭聲，無然亂周雅。

在家懷善篇頌

處塵貴不染，被褐重懷珠。美玉曜幽石，曾蘭挺叢芻。四氏不爲侶，三界豈能渝。諒茲親愛染，寧以財利拘。煩流捨智寶，榛路坦夷途。萬物竟何匹，烈火樹紅芙。

三界內苦篇頌

心怨動紛，遠情怡輒遷。互歡愛一離，遠傷憂坐衰。暮連幌，結清陰。高臺起風露，腐毒緣芳旨。天伐實脩嫜，慾網必虧生。繁且或全兔，眇眇夜何期。悠悠終肯悟。

出三界外樂篇頌



端襟測煩海，矯步寫埃氛。三受猶絕雨，八苦若浮雲。輪心仰圓極，罄質委方墳。朝遊淨國侶，暮集靈山羣。燈祇開違照，香字薦嘉薰。俛首睇人俗，信矣靜爲君。

斷絕疑惑篇頌

生塗非一理，識緒固饒津。徒駭東陵富，空嗟北郭貧。國生曾已戾，顏氏信爲仁。逢尤昭往業，習善會茲身。勤憂永夷泰，晏安終苦辛。合名且云重，豈若樹良因。

十種慚愧篇頌

神膏施惟重，玄酒恩未隆。明璣隋水上，潤玉藍田中。稟天性所極，資敬道攸崇。羽毛共以勢，輪軌相爲通。報德愴前雅，酬言愛餘風。遵途每多舛，顧省能無忡。

極大慚愧篇頌

冬、狐、理、豐、毳、春、蠶、緒、輕、絲、形、骸、翻、爲、阻、心、識、還、自、欺、華、容、羈、卯、日、生、平、少、年、時、驅、車、追、俠、客、酌、酒、弄、妖、姬、但、念、目、前、好、安、知、身、後、悲、惕、然、一、以



愧永與情愛辭

善友獎勸篇頌

蘭室改蓬心、梅崖變伊草、丹青有必渝、絲縷豈常皓、曲轅且繩直、詭木遂雕藻、一簣或成山、百里倦中道、隆漢乃王臣、失楚信元保、勉矣德不孤、至言匪虛造、

戒法攝心篇頌

金山嚴寶仞瓊、畹烈一瑤、萋牆狐議不窟、檐鷓豈能棲、淨花莊思序、慧石盟身倪、六羣倘未一、七

衆固恒齊、端儀有直景、正道無傾蹊、維官超以悟、襄野竟何迷、

自慶畢故止新篇頌

春非我春秋非秋、一經長夜每悠悠、陶形練氣住元造、啓蒙夷阻出重幽、榮公三樂非爲曠、箕生五福豈能求、靈姿妙境往難集、微言至道此云修、年逢生幸曾以慶、盈愆貳過倘知憂、畢故斷新別苦海、希賢庶善憑智流、

大忍惡對篇頌



三寶集 卷全  
春山之下玉抵禽，漢水之陽璧千金。清業神居  
德非重，潔已愚侶道已深。愛憎喜怒生而習，榮  
華芳旨世所欽。鴻才巨力萬夫敵，誰肯制此方  
寸心。逸驥狂兕獷不御，繁羈密柙儻能禁。遣情  
遺事復何想，寂然無待恣幽尋。

緣境無礙篇頌

况象惚物終不名，龍舉鸞集竟誰辯。絕智亡身  
孰爲礙，韜名戢曜故能顯。匪日匪月灼以懸，安  
飛安翔虛而踐。壁石無間恣出沒，水火有性任  
舒卷。敷教應俗鷲泉流，現迹依方迅風轉。大哉  
超世莫與羣，希轅慕舜宜自勉。

一志努力篇頌

像北二山尚有移，河中一洲亦可爲。精誠必至  
霜塵下，意氣所感金石離。有子刺掌脩各立，王  
生擢髮美譽垂。自來勤心少騫墜，何不努力出  
憂危。勝幡法鼓榮且擊，智師道衆紛以馳。有常  
無我儼旣列，無明有縛孰能窺。

禮舍利寶塔篇頌



越人鑄金誠有思，魏后粧木亦云悲。中賢小節  
猶可戀，去聖彌遠情彌滋。祇樹蕭條多宿楚，王  
宮寂寞歎遺基。設像居室若有望，間儀駐景曖  
如之。連卿共日獨先後，道悠命舛將無時。傾懷  
結想惻以慕，乖靈寫照拂塵疑。

敬重正法篇頌

出不自戶將何由，行不以法欲焉脩。之燕入楚  
待駿足，陵河越海寄輕舟。仁言爲利壯已博，聖  
道弘濟逸難求。通明洞燭煥曾景，深凝廣潤湛  
淵流。翼善開賢敷教義，照蒙啓惑滌煩憂。功成  
弗有名弗居，淡然無執與化遊。

奉養僧田篇頌

五玉已潤談而信，八桂雖芳風乃掃。妙理至言  
唯聖寶，不自伊人孰弘道。照空觀法識遷流，撫  
俗瞻光厭生老。絕滅情嗜斷懽怡，縱落豪華棄  
雕藻。親愛倏忽信風煙，財利悠悠若塵草。測以  
龍雲豈曰高，濯足江漢更慚皓。

勸請增進篇頌



王寧文集 卷全  
俟河之清逢聖朝，靈智俯接一其遙。白日馳光不流照，葵藿微志徒傾翹。遍盈空有盡三界，綿塞宇宙罄八遼。德光業遠升至覺，寂寞常住獨能超。煎灼欲火思雲露，沈汨使水望舟橋。弘慈廣度昔有誓，法輪道御且徐驅。

隨喜萬善篇頌

聞善若已燭，良書見賢思齊美。通誥感幽動地，孝有誠，殞首流腸忠爲操。振禮摛文弘憲則，機謀颺勇靜姦暴。明白入素志，冲聞高論窮微契。神奧捐軀濟物不邀名，輕財貴義豈期報。百行萬善紛塗軌，求誠罄想畢歡蹈。

迴向佛道篇頌

悠悠九土各異形，擾擾四俗非一情。驅車秣馬徇世業，市交鬻義銜虛名。三墨紛紜殊不會，七儒委鬱曾未并。吉凶拘忌迺數術，取與離合實縱橫。朝日夕月竟何取，投巖赴火空捐生。咄嗟失道爾迴駕，沔彼流水趣東瀛。

發願莊嚴篇頌



玉寧苑集 卷全  
心所期兮彼之岸、何事浮俗久淹追、照慧日兮  
駕法雲、騰危城兮出塵館、芳珠燁兮聞歲時、寶  
樹颺兮警昏旦、清露搏甘永以挹、喜園流采常  
爲玩、無待殷鼎方丈羞、安用秦箏織指彈、勒誠  
款願長不渝、習苦塵勞從此捍、

哀策文

皇太子哀策文

繡幕啓塗、銅池從殯、葆鐸旣行、枚紵且引、皇帝  
痛深盛之闕奉、哀七鬯之有亡、憫含嗟乎崇正、  
顧掩欵於承光、式睠元良、永懷人寶、俾茲史策、  
載餘風道、其辭曰、

居辰北極、在日重離、誕惟妙善、克自生知、資神  
爲契、合聖如規、地維缺位、月紀訾期、哀纏晦朔、  
燧改歲時、饘粥不溢、薑桂無滋、俛終心禮、昌我



帝基思皇下武，纘戎上德。將叶人神，永貽家國。用稽嗣典，實弘儲則。庸器改物，徽號崇名。往辭綠蓋，來馭朱纓。旂旗旖旎，鸞熏聲明。守器宣華，訪安永福。上漏驂軒，初晨戒服。慶色伊蒲，寅儀載肅。至誠莫感，遐福空辭。氛程月志，禋動年司。素媛犯列，青雲失滋。中楹軫夢，當戶陳詩。楚藥毀方，秦鑿反轍。高議虛演，奇文徒說。遠賓上靈，長違昭世。痛結宸慈，哀震華棣。嗚呼哀哉，軒帷高寂。庶帳深陰，鶴關晝掩。鳧燈夜沉，仍襲未改。客饌如臨，曖徽儀而可慕。標嗣子之純心，嗚呼哀哉。韋弁告期，麻衣請日。辯域展圖，揚龜獻吉。文物充階，具僚在側。總芟挽之哀淒，視風煙之騷瑟。嗚呼哀哉，飾麾輅而南指。轉旌羽而北徂，車結軫於雕轂。馬緩節於金蘇，寄靈心於萬象。增戀戀於國都，嗚呼哀哉。光徒靡而欲沉，山荒涼而遂晚。城闕緬而何期，平原忽而超遠。情有望而弗追，顧如疑於將反。嗚呼哀哉。



墓銘

豫章王墓銘

傾袖傾淪，人網弛沒。半嶽摧峰，中河墜月。眷然  
曉隧，如何夜臺。鯨駮枕慕，葆吹徘徊。千秋萬祀，  
顧有餘哀。

永嘉長公主墓銘

作儀阿媛，取儷漢妃。相金陋質，穠李慚輝。肅穆  
婦容，靜恭女德。顧史求箴，披圖問則。慶善郁夷，  
與仁冥默。宵燧亡明，曉挽已聲。松門嚴澗，泉帳



寒清，悠哉白日，鬱彼佳城。

樂府

齊明王歌辭七首

應司徒教作  
以下五言

明王曲

明王日月照，至樂天地和。幸息雲門吹，復歇咸池歌。桂序金匏轉，瑤軒絲石羅。朱騏步躑躅，玄鶴舞蹉跎。露凝嘉草秀，煙度醴泉波。皇基方萬祀，齊民樂如何。

聖君曲

聖君應昌歷，景祚啓休期。龍樓神睿道，兔園仁



玉琴苑集 卷全  
義基海蕩萬川集，山崖百草滋。盤苗成萃止，滄  
靺異來思。清明動離軫，威惠被殊辭。大哉君爲  
后，何美唐虞時。

淶水曲

湛露改寒司，交鶯變春旭。瓊樹落晨紅，瑤塘水  
初淶。日霽沙澈明，風泉動華燭。遵渚泛蘭觴，乘  
漪弄清曲。斗酒千金輕，寸陰百年促。何用盡歡  
娛，王度式如玉。

採菱曲

炎光銷玉殿，涼風吹鳳樓。雕輪一作青輅僚平隰，朱  
櫂泊安流。金華妝翠羽，鷓首畫飛一作龍舟。荆姬  
採菱曲，越女江南謳。騰聲翻葉靜，散響谷雲浮。  
良時時一遇，佳人難再求。

清楚引

平原數千里，飛觀鬱峇峇。清月回將曙，浩露零  
中宵。轉葉度沙海，別羽自冰遼。四面通寒色，左  
右竟嚴飈。峭澗多榛梗，京索久塵苗。逝將憑神  
武，奮劍盪遺妖。



長歌引

周雅聽休明，齊德觀升平。紫煙四時合，黃河萬里清。翠柳蔭通街，朱闕臨高城。方轂雷塵起，接袖風雲生。酣笑爭日夕，絲管互逢迎。徂年無促慮，長歌有餘聲。

散曲

金枝湛明燦，繡幕裂芳然。層閣橫綠綺，曠席緬朱纏。楚調廣陵散，瑟柱秋風弦。輕裙中山麗，長袖邯鄲妍。徐歌駐行景，迅節淪浮煙。言願聖明

王、永、永、萬、斯、年

三婦艷詩

大婦織綺羅，中婦織流黃。小婦獨無事，挾瑟上高堂。丈人且安坐，調弦詎未央。

青青河畔草

容容寒煙起，翹翹望行子。行子殊未歸，寤寐君一作容輝。夜中心愛促，覺後阻河曲。河曲萬里餘，情交襟袖疎。珠露春華返，璿霜秋照一作晚。入室怨蛾眉，情歸爲誰婉。



同沈右率諸公賦鼓吹曲二首

巫山高

諸公詩別見謝  
沈二集此不載

想像

一作  
髣髴

巫山高，薄暮陽臺曲。煙霞乍舒卷，蘅

芳自斷續。彼美如可期，寤言紛在矚。憮然坐相  
思，秋風下庭綠。

芳樹

相望早春日，煙華雜如霧。復此佳麗人，含情結  
芳樹。綺羅已自憐，暗風多有趣。去來徘徊者，佳  
人不可遇。

臨高臺

遊人欲騁望，積步上高臺。井蓮當夏吐，窓桂逐  
秋開。花飛低不入，鳥散遠時來。還看雲棟影，含  
月共徘徊。

望城行

金城十二重，雲氣出表裏。萬戶如不殊，千門反  
相似。車馬若飛龍，長衢無極已。簫鼓相逢迎，信  
哉佳城市。

法樂辭十二首



天長命自短，世促道悠悠。禪衢開遠駕，愛海亂輕舟。累塵曾未極，心樹豈能籌。情埃何用洗，正水有清流。

右歌本起

百神肅以虔，三靈震且越。恒懼拚芳宵，薰風動蘭月。丹榮藻玉堦，翠羽文珠闕。皓毳非虛來，交輪豈徒發。

右歌靈瑞

韶年春已仲，明星夜未央。千祀鍾休曆，萬國會

嘉祥。金容涵夕景，翠鬢佩晨光。表塵維淨覺，汎俗迺輪皇。

右歌下生

襲氣變離宮，重柝驚層殿。曼響感心神，修容轉權宴。生老終已縈，歿病行當薦。方爲淨國遊，豈結危城戀。

右歌在宮

春枝多病天，秋葉少欣榮。心骸終委滅，親愛暫平生。長風吹北隴，迅瀑急東瀛。知三旣情暢，得



一乃身貞。

右歌四遊

飛策辭國門。端儀偃郊樹。慈愛徒相思。閨中空  
戀慕。夙隸乖往塗。駿足獨歸路。舉袂謝時人。得  
道且還去。一作顧

右歌出國

明心弘十力。寂慮安四禪。青禽承逸軌。文驪一作  
鑣。鏡重川。鷲巖標遠勝。鹿野寃清玄。不有希世  
寶。何以導濛泉。

右歌得道

亭亭雙月流。朏朏晨霜結。川上不徘徊。條間亟  
淪滅。靈知湛常然。符應有盈缺。感運復來儀。且  
厭人間世。音世

右歌雙樹

春山玉所府。檀林芳所棲。引火歸炎燧。挹水自  
清隄。菴園無異轍。祇館有同躋。比肩非今古。接  
武豈燕齊。

右歌賢衆



昔余輕歲月，茲也重光陰。閨中屏鈿黛，闕下挂纓簪。禪悅兼芳旨，法言戀一作清琴。一異非能辨，寵辱誰爲心。

右歌學徒

峻宇臨層穹，茗茗疎遠風。騰芳清漢裏，響梵高雲中。金華紛苒若，瓊樹鬱青蔥。貞心延淨境，遂業嗣天宮。

右歌供具

影響未嘗隔，晦明殊復親。弘慈邈已遠，齊后扇

高塵區中禊景福，寓外沐深仁。萬祀留國祚，億兆慶唐民。

右歌福應

少年子

聞有東方騎，遙見上頭人。待君送客返，桂釵當自陳。

江臯曲

林斷山更續，洲盡江復開。雲峯帝鄉起，水源桐柏來。



思公子

春盡風颯颯、蘭凋木修修、王孫久爲客、思君徒自憂、

王孫遊

玉臺作  
春遊

置酒登廣殿、開襟望所思、春草行已歇、何事久佳期、

陽翟新聲

隋書翟  
作澤

懷春發下蔡、含笑向陽城、恥爲飛雉曲、好作鷓雞鳴、

永明樂十首

玄符昭景歷、茂實偶英聲、長爲南山固、永與朝日明、  
靈丘北翼棲、芳林合條起、兩代分憲章、一朝會書軌、

二離金玉相、三袞蘭蕙芳、重儀文世子、再奉東平王、

空谷返逸驂、陰山響鳴鶴、振玉躡丹墀、懷芳步青閣、



崇文晦已明，膠庠雜復整。弱臺留折中，沂川詠芳穎。

定林去喧俗，鹿野出埃霞。香風流梵瑄，澤雨散雲花。

楚望傾澠滌，日館仰鑿鈴。已晞五雲發，方照兩河清。

幸哉明盛世，壯矣帝王居。高門夜不柝，飲帳曉長舒。

總棹金陵渚，方駕玉山阿。輕露炫珠翠，初風搖

綺羅。

西園抽蕙草，北沼掇芳蓮。生逢承明樂，歿日生之年。

奉和秋夜長

玉臺作  
秋夜

秋夜長，夜長樂未央。舞袖拂花燭，歌聲繞鳳梁。

代五雜組

五雜組，慶雲發。往復還，經天月。不獲已，生胡越。奉和織織

兩頭織織綺上紋，半白半黑鷓鴣羣。膈膈膊膊



王寧朔集 卷全 五  
鳥迷曛磊磊落落玉石分

詩

贈族叔衛軍

台曜澄華、鉉岳裁峻、經天爲象、麗地作鎮、不器其德、有斐斯文、質超瑚璉、才逸卿雲、搖筆泉瀉、動詠靈紛、德聲伊何、如蘭之宣、貞筠抽箭、潤壁懷山、六樂畢該、五禮備貫、七訓是敷、三英有粲、惟旦惟公、惟公惟旦、

從武帝琅琊城講武應詔

治兵聞睿策、訓旅見周篇、教民良不棄、任智理



恒全白日映丹羽，頽霞文翠旒。凌山炫組甲，帶水被戈船。凝葭鬱摧愴，清管乍聯綿。早逢文化洽，復屬武功宣。願陪玉鑿右，一舉掃燕然。

棲玄寺聽講畢遊邸園七韻應司徒教

道勝業茲遠，心閒地能隙。桂撩鬱初裁，蘭墀坦將闢。虛檐對長嶼，高軒臨廣液。芳草列成行，嘉樹紛如積。流風轉遲遲，清煙泛喬石。日汨山照紅，松暎水華碧。暢哉人外賞，遲遲眷西夕。

維體報范通直

和璧荆山下，隋珠漢水濱。無雙自昔代，有美今為隣。三楚多秀士，江上復才人。緝蕭非善賈，聖德可名臣。追飛且學步，共子奉清塵。紫庭風日好，青槐枝葉新。徘徊吹樓側，欲見心所親。刻君蘭蕙草，何用以書紳。

別蕭諮議

徘徊將所愛，惜別在河梁。衿袖三春隔，江山千里長。寸心無遠近，邊地有風霜。勉哉勤歲暮，敬矣事王臺容光。山中殊未懌，杜若空自芳。



寒晚敬和何徵君點

疎酌候冬序，閒琴改秋律。如何將暮天，復值西  
歸日。搖落迎軒牖，飛鳴亂繩草。煙灌共深陰，風  
篁兩蕭瑟。虛堂無笑語，懷君首如疾。早輕北山  
賦，晚愛東臯逸。上德可潤身，下澤有徐轡。叶音必

和王友德元古意二首

遊禽暮知返，行人獨未歸。坐銷芳草氣，空度明  
月輝。嘖容入朝鏡，思淚點春衣。巫山彩雲沒，淇  
上綠楊稀。待君竟不至，秋鴈雙雙飛。

霜氣下盟津，秋風度函谷。念君淒以寒，當軒卷  
羅縠。織手廢裁縫，曲質罷膏沐。千里不相聞，寸  
心鬱紛蘊。平况復飛螢夜，木葉亂紛紛。

奉和竟陵王郡縣名

追芳承荔浦，揖道訊虛丘。升裾臨廣牧，從望盡  
平洲。曾山臨翠坂，方渠緬清流。陽臺翻早茂，陰  
館懷名秋。歲宴東光弭，景仄西華收。端溪慙昔  
彥，測水謝前修。往食曲阜盛，今屬平臺遊。燕棠  
缺，初雅鄭袞息。遺謳久傾信，都美乃結茂陵儔。



河間誠可詠，南海果難遊。

遊仙詩五首

桃李不奢年，桑榆多暮節。常恐秋蓬根，連翩因  
風雪。習道遍槐岷，追仙度瑤碣。綠帙啟真詞，丹  
經流妙說。長河且已縈，曾山方可礪。叶音列  
獻歲和風起，日出東南隅。鳳旂亂煙道，龍駕溢  
雲區。結賞自員嶠，移讌乃方壺。金卮浮水翠，玉  
笋挹泉珠。徒用霜露改，終然天地俱。  
命駕瑤池隈，過息羸女臺。長袖何靡靡，簫管清

且哀。壁門涼月舉，珠殿秋風迴。清鳥驚高羽，王  
母停玉杯。舉手暫爲別，千年將復來。  
湘沅有蘭芷，泪吾欲南征。遺珮出長浦，舉袂望  
增城。朱霞拂綺樹，白雲照金楹。五芝多秀色，八  
桂常冬榮。弭節且夷與，參差聞鳳笙。  
命駕隨所卽，燭龍導輕鑣。沙澤振寒草，弱水駕  
冰潮。遠翔馳聲響，流雪自飄颻。忽與若士遇，長  
舉入雲霄。羅繹徒有睨，蟪蛄已寥寥。

春遊迴文詩



玉、寧、前、集、卷、全、  
枝、分、柳、塞、北、葉、暗、榆、關、東、垂、條、逐、絮、轉、落、葢、散、  
花、叢、池、蓮、照、曉、月、幔、錦、拂、朝、風、低、吹、雜、綸、羽、薄、  
粉、艷、粧、紅、離、情、隔、遠、道、歎、結、深、閨、中、

侍遊方山應詔

巡、躅、望、登、年、帳、飲、臨、秋、縣、日、羽、鏡、霜、潯、雲、旗、落、  
風、甸、四、瀛、良、在、目、八、寓、宛、如、見、小、臣、竊、自、嘉、預、  
奉、柏、梁、讌、

奉辭鎮西應教

未、學、謝、能、笑、高、義、幸、即遊、雷、庭、參、辯、爽、梁、苑、豫、

才、鄒、徘、徊、歲、光、晚、搖、落、江、樹、秋、風、旗、縈、別、浦、霜、  
增、邈、遙、洲、

餞謝文學離夜

所、知、共、歌、咲、誰、忍、別、笑、歌、離、軒、思、黃、鳥、分、渚、夢、  
青、莎、翻、情、結、遠、旆、灑、淚、與、行、波、春、江、夜、明、月、還、  
望、情、如、何、

和南海王殿下詠秋胡妻七首

日、月、共、爲、照、松、筠、俱、以、貞、佩、紛、甘、自、遠、結、鏡、待、  
君、明、且、協、金、蘭、好、方、愉、琴、瑟、情、佳、人、忽、千、里、幽、



閨積思生

景落中軒坐，悠悠望城闕。高樹升夕煙，層樓滿  
初月光陰非或異，山川屢難越。輟泣揜鉛姿，搔  
首亂雲髮。

傾魄屬狙火，搖念待方秋。涼氣承宇結，明熠僚  
墀流。三星亦虛暎，四屋慘多愁。思君如萱草，一  
見乃忘憂。

杼軸鬱不諧，契濶彌新故。朔風欄上發，寒鳥林  
間度。客遠乏衣裘，歲晏饒霜露。參差興別緒，依  
遲起離慕。

願言如可信，行邁亦云反。晞景不告勞，瞻途寧  
遽遠。何以淹歸轡，蠶安事春晚。送日亂前華，馳  
心迷舊婉。

椒珮容有結，振芳跂路隅。黃金徒以賦，白珪終  
不渝。明心良自皎，安用久踟躕。遄車及粉巷，流  
日下西虞。

披帷悵有望，出門遲所欲。彼美復來儀，慙顏變  
欣囑。蘭艾隔芳臭，涇渭分清濁。去去夫人子，請



殉川之曲

琵琶

同賦諸公別見

抱月如可明，懷風殊復清。絲中傳意緒，花裏寄春情。掩抑有奇態，悽鏘多好聲。芳袖幸時拂，龍門空自生。

詠幔

古文苑作謝朓

幸得與珠綴，曩歷君之楹。月映不辭卷，風來輒自輕。每聚金鑪氣，時駐玉琴聲。但願置尊酒，蘭缸當夜明。

樂名

重臺信嚴敞，陵澤乃闕荒。石蠶終未蠶，垣衣不可裳。秦芎留近詠，楚蘅搢遠翔。韓原結神草，隨庭銜夜光。

星名

眇歎屬辰移，端憂臨歲永。久慙入漢客，每愧遵河影。仙羽誠不返，蓬襟良未整。誰謂無正心，大陵有霜穎。

奉和月下



雕雲度綺錢，香風入珠網。獨知此夜月，依遲慕神賞。

詠池上梨花

翻堦沒細草，集水間疎萍。芳春照流雪，深夕映繁星。

詠梧桐

騫鳳影層枝，輕虹鏡展綠。豈數龍門幽，直慕瑤池曲。

詠女蘿

幕巖女蘿草，蔓衍芴松枝。含煙黃且綠，因風卷復垂。

移席琴室應司徒教

雪崖似留月，蘿徑若披雲。潺湲石溜寫，綿巒山雨聞。

抄衆書應司徒教

說禮固多才，惇詩信爲善。巖笥發仙華，金滕開碧篆。

自君之出矣



自君之出矣，芳蕤絕瑤卮。思君如形影，寢興未曾離。

自君之出矣，金鑪香不然。思君如明燭，中宵空自煎。

擬古二首

花蒂今何在，亦是林下生。何當垂雙鬢，團扇雲間明。  
鏡臺今何在，寸身正相隨。何當碎聯玉，雲上壁已虧。

四色詠

赤如城霞起，青如松霧澈。黑如幽都雲，白如瑤池雪。

離合賦物爲詠

冰容慙遠鑒，水質謝明暉。是照相思久，早望行人歸。

雙聲詩

園蘅眩紅蘼，湖荇燁黃華。迴鶴橫淮翰，遠越合雲霞。



聯句

阻雪連句送贈和

積雪皓陰池，北風鳴細枝。九達密如繡，何異遠

別離。謝眺風庭舞流霰，冰沼結文澌。飲春雖以燠，

欽賢紛若馳。江秀珠霰條間響，玉溜檐下垂。杯

酒不相接，寸心良共知。王丞飛雲亂無緒，結冰

明曲池。雖乖促席讌，白首信勿虧。王蘭陵飄素

瑩簷溜，巖結噎通岐。罇罍如未泚，况乃限音儀。

謝洗原隰望徙倚，松筠竟不移。隱憂慙萱樹，忘

馬昊

NATIONAL CENTRAL LIBRARY, TAIWAN, R.O.C.



懷待山巵劉中書繪初昕逸翮舉日昃駑馬疲幽山  
 有桂樹歲暮方參差沈右率約

本傳

王融字元長琅琊臨沂人也祖僧達中書令曾  
 高並台輔僧達答宋孝武云亡父亡祖司徒司  
 空父道琰廬陵內史母臨川太守謝惠宣女惇  
 敏婦人也教融書學融少而神明警惠博涉有  
 文才舉秀才晉安王南中郎板行參軍坐公事  
 免晉陵王司徒板法曹行參軍遷太子舍人融  
 以父官不通弱年便欲紹興家業啓世祖求自  
 試遷秘書丞從叔儉初有儀同之授融贈詩及



書儉甚奇。憚之。笑謂人曰：穰侯印詎便可解。尋遷丹陽丞中書郎。虜使遣求書。朝議欲不與。融上疏。世祖荅曰：吾意不異卿。今所啓比相見。更委悉。事竟不行。永明末世。祖欲北伐。使毛惠秀。畫漢武北伐圖。使融掌其事。融好功名。因此上疏。圖成。上置琅邪城射堂壁。上遊幸。輒觀視焉。九年。上幸芳林園。禊宴。朝臣使融爲曲水詩序。文藻富麗。當世稱之。上以融才辯。十一年。使兼主客。接虜使。虜景高。宋弁。弁見融。年少。問主客。

年幾。融曰：五十之年。久踰其半。因問在朝聞主客作曲水詩序。景高又云：在北。問主客。此製勝於顏延年。實願一見融。乃示之。後日。宋弁於瑤池堂謂融曰：昔觀相如封禪。以知漢武之德。今覽王生詩序。用見齊主之盛。融曰：皇家盛明。豈直比蹤漢武。更慙鄙製。無以遠匹。相如上。以虜獻馬不稱。使融問曰：秦西冀北。實多駿驥。而魏主所獻良馬。乃駑駘之。不若求名檢事。殊爲未孚。將旦旦信誓。有時而爽。駟駟之牧。不能復嗣。



宋弁曰不容虛僞之名當是不習土地融曰周穆馬跡徧於天下若騏驥之性因地而遷則造父之策有時而躓弁曰王主客何爲殷勤於千里融曰卿國旣異其優劣聊復相訪若干里日至聖上當駕鼓車弁曰向意旣須必不能駕鼓車也融曰買奴馬之骨亦郭隗之故弁不能荅融自恃人地三十內望爲公輔直中書省夜嘆曰鄧禹笑人行逢大斡開喧湫不得進又歎曰車前無八騶卒何得稱爲丈夫朝廷討雍州刺

史王奐融復上疏命虜動竟陵王子良於東府募人板融寧朔將軍軍主融文辭辨捷尤善倉卒屬綴有所造作援筆可待子良特相友好情分殊常晚節大習騎馬才地旣華兼藉子良之勢傾意賓客勞問周欵文武翕翕輻湊之招集江西儉楚數百人並有幹用世祖疾篤暫絕子良在殿內太孫未入融戎服絳衫於中書省閣口斷東宮仗不得進欲立子良上旣蘇太孫入殿朝事委高宗融知子良不得立乃釋服還省



歎曰。公誤我。鬱林深忿疾融。卽位十餘日。收下廷尉獄。然後使中丞孔稚珪倚爲秦。使融依源據荅。詔於獄賜歿。時年二十七。臨歿。歎曰。我若不爲百歲老母。當吐一言。融意欲指斥帝在東宮時過失也。融被收。朋友部曲。參問北寺相繼於道。融請救於子良。子良憂懼不敢救。融文集行於世。

史臣曰。晉世遷宅江表。人無北歸之計。英霸作輔。芟定中原。彌見金德之不競也。元嘉再略河南。師旅傾覆。自此以來。攻伐寢議。雖有戰爭事。存保境。王融生遇永明。軍國寧息。以文敏才華。不足進取。經略心旨。殷勤表奏。若使宮車未晏。有事邊關。融之報効。或不易限。夫經國體遠。許久爲難。而立功立事。信居物右。其賈誼終軍之流亞乎。

贊曰。元長穎脫。拊翼將飛。時來運往。身沒志違。


齊王寧朔集終



王寧齋集

卷全

本



國家圖書館, NATIONAL CENTRAL LIBRARY, TAIWAN, R.O.C.